

Jemizai

Jemizai Pikariyikwia Yidavakesi.

1 ¹Yizirelidaa'nya siviliridaa'nyi pwaraala yisavaakidaa'nyaihi, Jemizainyi Gotiyariji Naanga Jizaazai Kiraazitiyariji yaasiwa'wawinyainyi yida'mwesi. Sarimi sarinnya anga naangeba yagalya'ma'divi' kwaaka maave piwi piwi mwaimanaawigasaihirinesi. Sareihiri yihithima! “Nya'mweih!”

Yijiwaalyabwi kiri' diraginya yivaimwanga neyadevwinesi.

²Nimire nya'mweih, yaamiji yijiwaala dala pininnanyabwi kayihima'noji yi sarimi dara yawipija “Sa nemi yune yilaaya ya'nennanyangira.” ³Sare' sarimi dara yawi'maniga'. Sariminyi yijiwaala ya'ne yima'naabada sarimire diraginna limwangebwi yaamiji yihyade. Sara yihyaja sabwi “Taanginya yuyangine'na diraginna daavina yiwaava!” nejiwiryanebuliyi. ⁴Nabaai Gotiyai “Sarimi naanga yune nebulya'nanyaihi jima'nyila! Simunyavi yunebanna pada'galemwaalya'neihi yuyagaa' diraginna daayabwi tewaanna tivi'na yihimwaaihana!” kada' sara yima'nivani'. Yi diraginyaihi mwaabiza' sariminyi Gotiyare aane piwina aane kibwina yihimudaasadeihi mi'. ⁵Nabaai sariminyidaa'nyi a'mwe pwai kwari simunya nawi'nyabwina wimudaasaja' sai simunya wijaavade'na Gotiyari yidaanganana! Sara yidaanganaja' Gotiyai sahwari wijaavadelyi. Gotiyai sai yuyaraavina yanga kwalaalya nayaa wijaavadei, nabaai sai a'mwe wimudaasaderaavina mayagaala dadei mi'. ⁶Kiri' a'mwe dazai Gotiyari nayaa diraginna limwada yidaanganana! Dara nyawiralimwagathika! “Nimi yidaangamwe daza' Gotiyai nyijaavadeinyi dingaka? Aawa!” Sare' dare'nanyi. A'mwei simunya piriwaai kininnakei, saalaalyavi yihusa' pwaladikaa'da aalimavajinaake' akinamuna yadevaabi' gamire simunya' sasarelyi. Sahwai taabiriwaizimunyasyai. ⁷Sare'

darevinyi. A'mwe sasarei kwaasi dara myawiranna! “Naangei nawi'nya pini nyijaavadeinyira.”⁸ Aawa. A'mwe dazare simunya' yaasiwa' yiwinakamarya yadesi. Yuya gami yade saburi sai tuta yune gave pirivina mididei mi'.

⁹Neya'mwei gilyivita maayai dalaangevi mwaalikei Kiraazitiyarina yilaaya yadelyi. Kiraazitiyarina Gotiyai sahwari munyaba makimwake'na yilaaya yana! ¹⁰Nabaai neya'mwei gilyivikiravinakei Kiraazitiyarina yilaaya yadelyi. Gotiyai sahwari gamire gilyivisanna dalaangevi marulawakaka kiri' sahwari maa'mwake'na yilaaya yana! Kurivaariyangire pwata yi'nade bwalapiraihirana yadevaabi' gamire gilyivisaji yiwawade'nanyi. ¹¹Sare' darevinyi. Nyilyai bilyiri'daa'nyi di'daanya naanga wi'nadaa'nyi kurivaariya daza yinahu yawaka balasi'na yadengi. Gamire pwata kiniji bwalaraawina yada gamire tewaanya wannade saji yinahu kayaaka yima'nyina. Sasare sahibaaibi' a'mwe gilyivita kwalaalyajiyai sai tinnyaba gamire wawinya yade yuya sangi yiwawadelyi.

¹²A'mwei yaamiji yijiwaala yuya sangi taanginya maarajai kwai diraginna daa'dei yilaaya yada tewaanaanga yinikelyi. Sare' dare'nanyi. Yijiwaala yuya mena wawilavojiyai kuna diraginna limwagarojiyai, sarina Gotiyai gaalyabwi wijaavadelyi. A'mwe gavamarasi'nyikaanya' wawila'divisaraavine tivikisa' wijaavadivitabaabi' Gotiyai mena yawiramaa'dei gaala sa' wijaavadelyi. Yi sinnawi Gotiyai gaala daza' a'mwe yuyara gaminyina wivu'naderaavina wijaaya'na yune naanga nebulya'na widakelyi. ¹³Nabaai yijiwaala sa a'mwe pwai kware simunyavi yidikaavoji kayaa'nanyabwi ya'na kumwagi'noji aane pwai kwai dara madanna! “Dazabwi ya'na Gotiyai nyimwagi'niwake'nanyi.” Aawa. Sare' darevinyi. Kayaa'nanyabwi Gotiyaridaa'nyi mwagi'nadevwi mi'. Nabaai Gotiyai a'mwei kayaa'nanya yajari mwagi'nadei mi'. ¹⁴Aawa. Neminyidaa'nya gazaizare simunyavidaa'nyi dikaa'da wimwagi'nadelyi. Yune nennya yawita kayaa'nanya dazabwi neminyi wabwiwanga neyadevulyi. Sara yada neminyi kwaasi nedada kayaa'nanyabwi ya'na nedihaa'bwa'devulyi. ¹⁵Nabaai simunya' dikaata dazabwi, kaimiraavimunyabi' wannada dividaa'nyi gamire kaimiraavibwaranyabi' kayaa'nanya dala pininnanya maa'desi. Dividaa'nyi kayaa'nanyabwi naanga yima'nada barya ya'nebwi marima'naabadevulyi.

¹⁶Nimire nya'mweihirina tewaanya nyivu'nadeihi, kwaasiya sabwi sarimi wanganakina yadaapi sariminyi kwaasi nayihithathika! Gotiyai kayaa'nanya ya'na mwagi'nadei mi'. ¹⁷Yuya tewaanya yanga wijaaya sabulyi yuya sihumale naanga yune nebulya'nanya sabulyi yuya daza Gotiyai Sigunyavi mwaalikeryawidaa'nyi waidaavadengira. Baaka yuya, yi nyilyalyi lawelyi silingaaminyaji yuyaraavine Gyakwalaangei daza neminyawinna maryasaabadengira. Nenimaanga dazai gamire

sabwi yaasiwa' maroyimaa'nya yadei mi'. Sai pini nyilyayaba a'mabaala yi'devaabitai mi'. Saaminaanga wannada ayina tuta yibwa'mwadevaabitai mi'. ¹⁸Sai yune gannya simunya saburina midida gamire yagaala nebulyavi neyima'naabakelyi. A'mwe yuya gami wimwaaihade saraavina aaya mudi'nanyaina mwaalya'neinaavi neyima'naabakeine.

Nemi kadika nayaa wi'nadaa nayaa sara yaade'nesi.

¹⁹Nimire nya'mweihirina tewaanya nyivu'nadeihi, darengi nayaa jawiramaarila! Gazaigizaigi yagaalya' kadika wi'nya'na yarai yemwaala ja! Kiri' yagaala ja'na yime'nya'bi' nadithika! Nabaai mayagaalya' yime'nya'bi' nadithika! ²⁰Sare' darevinyi. A'mwere sinna tike' Gotiyare yida'maraangebwi sahwari wivu'nadevwi marima'naabade' mika. ²¹Sarevi girikita'nanya yuya sabulyi kayaa'nanya kwalaalya naanga yima'nade sabulyi sasare daza dasi'nyila! Nabaai sarimi saihi kwaamu'nanyabwi nayaa mididivi' yagaala Gotiyai sarimire simunyavi wia yihiburimanike nayaa dimaaryila! Yagaala daza' sarimire kuryaraavi yiniga wi'na yihivadaihasamaaradesi.

²²Kiri' sarimi yagaala daza' nayaa jila! Sarimi yune kadiki'na mu'nakipinera! Kadiki'na wi'nakipija' sarimi saihirina kwaasi yimanigava. ²³Dare'nanyi. A'mwe pwai Gotiyare yagaalya' yaasiwa'na wi'nakajai sai nayaa mamidinyajai sai dare'bisalyi. A'mwei gannya sinnyiki sinimwavananyavi yennadevaabisalyi. ²⁴Sare' darevinyi. Sai gannya sinnyiki yennaka sangiri' kibawebanna woda yime'nya'bi' navika yiwannyina yakelyi “Sinnyi' nimi gatha'dareinyi dingaka?” Sabaabi' sai Gotiyare wija navika yarai yadelyi. ²⁵Kiri' kiwinya daza' kayaa'nanyabure kalavuziwawinyavi ayina nemaade' sa' yune yida'maraange' yi dinika dazavire aaya kaavilya' a'mwei nayaa yawiranganoji kuna midinajai yi a'mwe dazai yilaaya yada tewaanaanga yinikei mwaaladelyi. Sai yaasiwa' kadike'na mu'nakyada navika myanna! Aawa. Gotiyare yagaala tewaanya' sara yana! Yi dazareri Gotiyai tewaanya wiadelyi.

²⁶A'mwe pwai kwai dara yawi'na “Nimi yida'maraanga tewaanyainyi. Gotiyari yilaaya nebwina yadinyainyira,” kiri' gamire maangevi nayaa mamaremwaainyai sare sai gannya simunyavi kwaasi didelyi. A'mwe dazare diragina limwangebwi, yilaaya maryabwi yaasiwakebulyira. ²⁷Yida'maraangebwi nawi'nya giri'maaya mwaalyabwi Gotiyai Nenimaangere tinnyari yiwetawakya maaya yima'nya' daresi. Sigiraayaraaviji yaanyiwaakengiji sare samilika taanginya maa'manigasamilikaavina nemi nayaa gaimwagaatheine. Nabaai nemire kaanya yamaryabwi nayaa maremwainaana! Kwaaka davakiya dazabwi nemire simunyangi girikita naneyigaladika! Sasaresi.

A'mwe yuyaraavina kale avaaina neyadevwinesi.

2 ¹Nimire nya'mweihi, nemire Naangei Jizaazai Kiraazitiyai byaanna diraginya' kininnakeri diraginna limwadivisavi sarimi a'mwe yaya kininnakeraavina nayaa yina, a'mwe gilyivi'maayaraavina bule'na wijaavina nyipidika! ²Sare' darevinyi. Sarimire yi'bwa'nemwaaaliangevi a'mwei baazi'ma'nya nawi'nya' kininnakei nabaai nigwilalaaka nawi'nya kininnakei wilaabina yajai, nabaai a'mwe gilyivi'maayai baazi'ma'nya yune kayaa'nanya' kininnakei sai kwalyi wilaabina yajai, ³sarimi a'mwe baazi'ma'nyaji kannyasi nawi'nya yira'nojia sarina nawi'nya yina yapiji sahwari duzide “A'mweigi, namwaalyita nawi'nya dari bilamwaala!” Kiri' a'mwe gilyivi'maayari dara duzide “Giminyineba piba mi'. Gimi aagaiba dithaa'deigi dingaka? Minyevi nimire sivigi'nyiryaba saba dimwalaadeigi dingaka?” ⁴Yi sarimi sasare sabwi yipija' sarinnya siryamweraavina dinyina “Kumire nigwilalaaka danganyila! Pwara naangerera. Pwara waryaanyarera.” Sara yipija' sahwaraavi jaapaina jideihi midaaka! Sarimire simunyaburidaa'nyi kayaa'na myawibwapina! Sara yipija' avaaina yadivitaihi mi'.

⁵Nimire nya'mweihirina tewaanya nyivu'nadeihi, nayaa dara du'nyila! Gotiyai mena dathareraavi dahilakakera midaaka! Yi a'mwe Kwaakevakiyabulyiyara “Gilyivi'maayarera,” didivisara yi sahwaraavina Gotiyai dina “Nimirera.” Sahwara Kiraazitiyari limwaga'divisavina Gotiyarine kwalaalya naanga kininnakere. Sinnawi Gotiyai gamire maremwaaide' wijaavade' gamire kaimiraayaraavina yune naanga nebulya'na dakelyi. Yi sahwara gaminyina wivu'naderaavina sara dahilakakelyi. ⁶Kiri' sarimi a'mwe gilyivi'maaya dazaraavi wagila wijawaasarera. A'mwe gilyivikiravinakera sariminyi yihimarulawakadivi' taanginya yihwakivanigatara midaaka! Yune sahwara sariminyi kotiyavina yihimakwodivitaru midaaka! ⁷Kiraazitiyarine yaya' sariminyi Gotiyai yaya tewaanya' yihwakakelyi. A'mwe dazazara yaya tewaanya dazavina biraiyagaala dadivitaru midaaka! Sare' yawirapiji gilyivi'nakeraavine yaya yaasiwa'na mamakibina!

⁸Nemire Kingiyai Bukuyavi kiwinya piri' dakelyi. Dara dini! “Yune gimi saiginyina givu'nadevaabi' sasare sahibaabi' giminyi a'mwe pwaraavina nayaa nebwinu givu'nana!” Sarevidaa'nyi kiwinya dinika dazavi nayaa nebwinu midibiza' yi sarimi nawi'nyabwi yivaniga'. ⁹Kiri' sarimi a'mwe yaya kininnakeraavina nayaa yipija' a'mwe gilyivi'maayaraavina bule'na wijaavipija' sabwi kayaa'nanyabwi yadivisaihilyi. Sarevi kiwinya daza' sarimire simunyavi maanga dara yihizidavadeihilyi “Sarimi a'mwe kiwinya' galazekivaimwaasaihilyira.” ¹⁰Sare' darevinyi. A'mwei kiwinya yuya piningiji midinajai kiri' kiwinya dinika pirivina pari'ma'mwakei sai Gotiyare tinnyari yuya kiwinya

dinikengina yiwetawakya yiwakelyi. ¹¹ Sare' darevinyi. Gotiyai dara dini' "Pwarevi ata malimwadinna! Pirivireri ata malimwadinnera!" Sara dinika sai nabaai pirisi dara dini' "A'mweri maramakinna! A'mwevi maramakinna!" Sare' gimi a'mwevi ata malimwagi yija' kiri' a'mwe pwari tamakija' yi gimi kiwinya dinike' mena pari'ma'mwaanyaiginyi. ¹² Kiwinya kayaa'nanyabure yaasiwa'wawinya' ayina nemaade' yi dazavina Gotiyai marayihyawibwaradevaai' yuyagaa' sarimi yagaala piniji yiniga wi'na dizila! Yi yuyaburaavi nayaa yiniga wi'na jimwannyila! ¹³ Sare' darevinyi. A'mwe pwai a'mwe pwarina kale'na gaimwanga mwiade sari nabaai Gotiyai kotiya' wiawibwaradehaa' sarina kale'na gaimwanga wiadei mi'. Kiri' a'mwei a'mwe pwarina kale'na gaimwanga wiade kale'na gaimwanga sa' kotiya savi yiniga wi'na wawilavadesi. Gotiyai sahwari jidavadei mi'.

Diraginna limwangebulyi Kiraazitiyarina yadaanyabulyi sawaarinesi.

¹⁴ Nimire nya'mweih, a'mwe pwai kwai dara dazai "Kiraazitiyari diraginna limwadinyainyi," kiri' sai wana nawi'nyabwi myade a'mwe dazare diraginna limwangebwi yaasiwa'nanya' midaaka! Diraginna limwanga sasare sabwi sahwari yiniga mi'na padaihasamaarannei dingaka! Aawa. ¹⁵ Yi yaamiji yihithima! Neya'mwe pwai neya'mwe kiri' kannya waryaanya' kininnake' mwaalaja' nabaai wapaaya tika nya'ne mwari yaja' ¹⁶ sariminyidaa'nyi pwai samiliki widina "Kwaamu'nanyaburi yilaaya dimwaala! Gimi wawa'gizi baazi'ma'nya' gimire kilaakejiki di'mudinya yinya'ne' dimarakaawa! Nabaai wapaayaji maraawa'gizi gimire munyiki munya' yunebanna ginana!" Sara dipijaihi kiri' baazi'ma'nya piniji wapaaya piniji gaimwanga ya'ne mujaayi yipija' yagaala daza' gaimwange' gatha'dara yannevaka! ¹⁷ Sarevida'nyi diraginna limwanga kibwi nawi'nyaburi mima'naabi jajavwi kiri' gave' waraja' yi sa' bainikesi. Yi dazabwi gevulyira.

¹⁸ Sare kiri' a'mwe pwai dina "Kiraazitiyare pwara diraginna limwadivisare. Pwara wawinya tewaanyabwina yadivisare." Sare'na nimi dara wiriviki'mwa. Gimi gimire diraginna limwanga dazabwi dinyibwaridaakwa! Yi sabwi nawi'nya piburaavi yima'naabya'nebwi gavebwina dinyibwaridaakude' daaka! Kiri' nimi tewaanya sabwi yadinyangina nimire diraginna limwangebwi givwaridaakudeinyi. ¹⁹ Gimi diraginna dara limwadinyaiginyi "Gotiyai yune gave pwainanyai mwaalika." Sa' tewaanya' midaaka! Kiri' Saataanimirera yimakera kwaraji diraginna avaaina yawi'divisare. Sahwara Gotiyari mamidinyadivisa'na lika yiwaainadivisare. Sahwaraavi wawila'mwaai gi daaka! ²⁰ A'mwe sidu'maayaigi, gimi nawi'nya piburaji myadi yune diraginna limwange'na limwadinya' sabwi kuzi'nyabulyi. Yaasiwakesi. "Sare dazavire kaavilya' yawiranganima!" dahineigi daaka! ²¹ Nayaa

du'nana! Kigaakuna nemire Ne sinnawinyai Eviraami gannya gawaalivaangei Aazakimi kwaraanya livalaannekevi yilamarakakelyi. “Gotiyarine dika nasi'nana!” daka dika yira'divitabaabi! Gotiyari yaamiji wimaarya'nei mwaala'. Yi dazahaa' sara yake'na Gotiyai gamire dazabwi wanganaka “A'mwe yida'maraangelyi,” dakei midaaka! ²²Gimi yawirangamanigi. Gamire diraginna limwangebwi gamire tewaanya yaka sabulyi ye'mwannayakelyi. Sasare dazabwi gamire diraginna limwangeburi naanga yune nebulya'nanyaburi yunebanna yakebulyi. ²³Nabaai sare' Gotiyare bukuyavi dinike' yunebanna yima'nake'nanyi. Dara dini' “Eviraami Gotiyari diraginna limwagaka sarevi Gotiyai diraginna yawirawimwaaaha' ‘Sahwai yida'maraangelyi.’ ” Sare'na nabaai pimaginyavi dara dini' “Eviraami Gotiyare gya'mwelyira.” Eviraamimina sara dinikesi. ²⁴Nabaai sare' dahaa' sarimi yawirangamaniga'. Yune diraginna limwangeburina gaveburina Gotiyai “A'mwe yida'maraangelyira,” dadei mi!. Aawa. Sai yawi'da “A'mwei diraginna limwade sasare dazavi nawi'nyabwina yaderina yi dazahwarina ‘A'mwe yida'maraangelyi,’ ” dadelyi. ²⁵Sahibaaibi' nabaai a'mwe yaasiwa'na maradakunamaryake' Rayaa' nawi'nyabwina yakevina Gotiyai “A'mwe yida'maraangesira,” dakei midaaka! Sare' daresi. Yi a'mwe sa' Jozuwaa' a'mweraari maryasaabakeraarina “Nuramakipidika!” daka tuta pirivi nayaa ayina maryaasakeraalyi. ²⁶Yuya sare' darevinyi. Kilaakeji' kuryalyi maayaji' saji' mena bainikabaabi' a'mwei yaasiwa'na diraginna limwagazai kiri' nawi'nya kibulyi myadei, a'mwe dazare diraginna limwangebwi mena bainikebulyi.

Nemire yagaalyanna nayaa maremwainaade'nanyi.

3 ¹Nimire nya'mweihi, sariminyidaa'nyi a'mwe kwalaalyara “Nemi Gotiyare yagaalya' wijiwakadaanyaina yima'naana!” nyawipidika! Darevinyi. Divi sagaa' Gotiyai nemi wijiwaakyainaavi maryawibwasa' yawi'na “Sahwara sidu'nakera midaakaji, diraginna maryawibwarideinyi sahwaraaavi. A'mwe pimilikaavi kibawana yideinyi.” ²Sare' darevinyi. Nemi yuyaina dala pininnanyangi yiwetawakya kwalaalya yadaanyaine. A'mwe pwai kwai gamire yagaalya' yiwetawakya myajai sai a'mwe tewaanya naanga yune nebulya'nanyalyi. Nabaai sasarei gamire kilaaka yuya kiji' yiniga wi'na maremwainannelyi. ³Nemi a'mweina kwaari'mayaginya maalikemili' oziyare maangevi nemire saburi midida kaanya yamarya'nebwina wakadaanyi. Sarevidaa'nyi gamire kilaakeji' naangeji' warika kiri' yuya kilaaka saji' tutaanya pirivi kwawoji nemi ginyiwadaanyi. ⁴Nabaai sipiya kirivinaji jawirila! Sipiya sa naangengira. Nabaai yihuta diraginya naange' yihu'maanarya wiadaa'nyi saalaalyavi a'ba ga'nigwodengi. Sipiya'viya' a'mwei ginyiwaginyiwange' yune maalikesi. Kiri' sipiyavi maremwaaidei “Pimaginna wima!” dozi

ginyiwaginyiwange! ginyiwadaa'nyi sipiya! sawinna wina yadesi. ⁵Sasare sahibaaibi! taalisa! kilaakejikina pimagingya maalikejiki. Kiri! sa! gami savina yaya! munyaba makida naangenna naangenna dadesi. Yithaanyi, dika maalike! naanga bidamakiloji kuridarya naangevi yi'naadarya yuyavi dika yuya nasi'na yadesi. ⁶Nabaai taalisa! dika sahirisasi. Yuya kilaakejikine'na kusaba warike! Kwaakevakiya kayaa'nanya dala pibwina pibwinanyabwi marima'naabadesi. Sara yada kilaaka yuyajiki girikita yigalakadesi. Sarevi kilaakejikiya saburi dika naanga yidade sabi! dihaa'bwa'devulyi. Sarevidaa'nyi nemire kaanya yamarya sabwi kayaa'nanyabwi yima'nadevulyi. Yi Saataani Kayaa'nanyare dika daza! dika sahirivi yewitawakadesi. Dika naangebanne yimakera nemire taalisa! dihaa'bwa'divisavina taalita sa' a'mwe Kwaaka yuyavakiyaraavi taanginya dike'bi! marima'naabadesi. ⁷A'mwera malakayaawaryaraji yikuriyaawiaraji yusaraji kamaalyaraji saalaalyavi wila'deraji yi yuya dala pininnanyaraavi nayaa yiniga wi'na maremwaabinerera. Sahwaraavi dalaangewi wila'nadivisara. Nabaai kigaasi dahaa! mena sara yadivisare. ⁸Kiri! gamire taalisa! yiniga wi'na maremwaaladei a'mwe pwai kwai mi!. Aane pwai kwai sara myadelyi. Yuyagaa! taalita sa! dikebi! yidamaryada yagaala kayaa'nanya yinigidaavadesi. Naawinaanyara kumire kwaamina a'mweraavi tamakya'ne da'divitabaabi! taalisa a'mweraavire simunyangi kayaaka yuna yigaidivisangi. ⁹Taalisasi Naangei Nenimaangerine yaya munyaba makilya'ne dadaa "Su! Su!" dadaanyaine. Nabaai taalita sasi Gotiyai yune gamibisaraavi yavikaryaakeraavi nemi paasiyagaala sahwaraavi kayaaka yigalya'ne yagaala kayaa'nanya dadaanyaine. ¹⁰Yagaala Gotiyarina yaya munyaba makilya'neji paasiyagaala kiniji yagaala piriwaala sasare sa yune maanga gave pukidaa'nyi yima'nadengi. Nimire nya'mweihi, nemi sasare sabwi sara nyaadika! Nawi'nyabwi mi!. ¹¹Aaliyiminya piri! pigaa! aangaalyasi yaka pigaa! aalya yirikesi ye'mwannayiri'daavade' daaka! ¹²Nimire nya'mweihi, yita pihya piri! yisila woliviyavire yiniga tinade' dingaka! Nabaai wila giraiyibaabi yisila pihya yi'nadevaai dingaka! Yi saalaaliyiminya! aangaalya nawi'nya! miriyi yanesi. Sarevidaa'nyi nemire maangikidaa'nyi Gotiyari yileyagaalyaji a'mweraavi paasiyagaalyaji sara nadaathika!

Simunya tewaanya! Gotiyaryabadaa'nyi yima'naabade'nesi.

¹³Sariminyidaa'nyi a'mwe kwai simunya nawi'nyaji yawita tewaanyaji kininnakei dingaka? Sasare sai gamire kaanya yamarya sabwi tewaanya yima'nana! Sidusabwine kwaamu'na yajai tewaanyabwina yojjyabwi a'mweraavi simunya nawi'nyaburina yibwaridaakwana! ¹⁴Pwaraavireburana sarimi tiganaarya diraginya! kininnakeihi mwaabiza! nabaai sarimire yaya yuya sangina dihaa'bwasabwina

yawi'divi' sarimire simunyangi “Pwaraavi wawilavima!” yawipija' sarimire yawita sabwina yilaaya mipinera! “Nimi sidu'nakeinyi,” kwaasi nadipidika! Sarimi pihadikebwi yipija' nebulyaburi kayaa'na yipija' pwara “Sidu'nakeinyi midaakaji, gamirebwina ‘Kwaasiyalyi,’ neyibwaridaakuvani!,” nadibithika! ¹⁵Simunya sasare sabwi Sigunyavidaa'nyi waidaavadevwi mi'. Gotiyare' mi'. Aawa. Yune Kwaaka dathavakiyabulyi. Simunya yawakeburidaa'nyi yima'nadevulyi. Kurya Tewaanyarinebwi mi'. Sare sahirivine'na Saataani Kayaa'nanyai gyakwalaangelyi. ¹⁶Sare' darevinyi. A'mwe pwara a'mwe pwaraavireburana tiganaarya yadivi' kumire yaya makilya'nera dihaa'bwiasabwina yawi'daapiya'na a'mwe sasare sara nayaa pada'galemwaaidivitaru mi'. Gavamarasi'nyiyagaala didivisare. Nabaai sahwara kayaa'nanya yuya dala pibwinanyabwi yadivisare. ¹⁷Kiri' a'mwe pwara simunya munyabadaa'nya' Gotiyari maa'divisara darebwi yadivisare. Aaya mudi'nanya', simunya yida'maraangebwi midinna. Nabaai yawidaasa', a'mweraji avaaimunyi'na mwaalina, sara yadivi' kwaamu'na yina, pwaraavire yagaala dipija kadika nayaa wi'nyina. Kale'na gaimwanga naanga yina, tewaanyabwina yisila nawi'nyabisabwina yadivisare. Sahwara yuyaraavi simunya avaainanyabwina yadivi' nabaai kwaasi myadivi' kwaasi majadivisabulyi. ¹⁸Nabaai sahwara avaaimunyi'na yipija' “Pwaraavi munya yirila diwangeburi wimwaaihima!” yawipijara tika munne wia burijabi' yipinere. Kwaamu'nanya ya sasare sabwi yida'maraanga saburi tika munne tewaanya yi'bwaramadakya yima'nadevulyi.

Gotiyari dalaangevi marulawakinaade'nesi.

4 ¹Maimayagaala sariminyaba yihima'nivanika sangine aaya kaavilya' berivaka? Yi munyi' dikaata sabwi yihwa'devulyi. Sara yada sarimire kilaaka yuyajiki mala yihyadeziki. Nabaai sasare dazahibwi maimayagaala sabwi dihaa'bwa'desi. Sasare mi yadevwi dingaka! ²Sarimi gilyivita dala nabinabinya maarya'neihiri tewaanya yihivu'nadeihilyi. Kiri' sarimi mamaari yipineihilyi. Sara yadivi' sarimi a'mweraavire gilyivita maarya'neihi sahwaraavi tamakya'na yawi'divisaihilyi. Sarimi gilyivisangina tiganaarya yadivita sare sangi sarimi mamaaryadivisaihilyi. Sare savidaa'nyi sarimi maimayagaala kayaa'na dadivi' mala tannadivisaihilyi. Sarimi Gotiyari gilyivisa maarya'na yidaangadivitaihi mi'. Sara yadivi' sarimi mamaaryadivisaihilyi. ³Pigaa' sarimi gilyivisa maarya'na yidaangadivi' kiri' sarimi mamaaryadivisaihilyi. Gatha'darevinaka? Sarimire simunjabwi nayaa yida'na myadivi' Gotiyari yidangadaapi “Nemi yune wabahilaaka ya'neina gilyivita sa maraana!” yawi'divi' yidaangadivisa'nanyi. ⁴Sarimi a'mwe pwaraavirengi ata limwadivita sarabisaihilyi. Kwaa'nyi-

a'mwebisaihilyi. Dara myawirijivaniga! A'mwei Kwaaka davakiyabwina yilaaya jajai, sai Gotiyari yikamaangei yima'niwakelyi. Dazavi myawiranganyivanigasaihi daaka! Sarevidaa'nyi a'mwe pwai kwai Kwaakevakiya sabwi “Nya'mwana widima!” dozi jajai, yi sai Gotiyarina yikamaangei yima'nadelyi. ⁵Gotiyare Bukuya' dara dini! “Kuryai dazai Gotiyai neminyi kusawi nemwaaahadei yune gamire saburina diraginna yawi'da yune diraginaangelyi. Piburaavi ya'neji pwaraavi yilaaya marya'neji 'Arikewi!' yawiribainyina yada 'Gotiyai gave pwainanyari yilaaya marina jila!' yawi'delyi.” Sarimi dara dahayawi'maniga? “Yagaala daza' yaasiwa'nanya' dingaka!” Woi! Naangesi. Sare'na kayaa'nanya dazabura jahalya'mayila! ⁶Kiri' nemi kayaa'nanyabwi dathiwagya'neinaavi Gotiyai yanga gaimwanga naange' nejaavadelyi. Sarevi Bukuyavi dara dini! “Gotiyai a'mwe pihadika yadivisaraavi tivipalasi'delyira. Sara yada kiri' a'mwe kumire simunya' walamarakya yadivisaraavi yanga gaimwange' wiadelyi.” ⁷Sarevidaa'nyi sarimire simunya' walamarakya yapiji Gotiyari dalaangewi dimwaalyila! Sarimi Saataani Kayaa'nanyari dirivipalasi'nyila! Sara kyapiji yihyagalya'mavoji likaanya wawodelyira. ⁸Sarimi Gotiyaryaba aya kibanna nayaa dulaawila! Nabaai sahwai sariminyaba aya kibanna bathelyi. A'mwe kayaa'nanyabwi yadivisaihi, a'mweigi ginnya asiraai aalya jinana! Taabiriwaizimunya kininnakeigi nawi'nya tewaanya wannadevaai'bi' girikita kayaa'nanya ginnya simunyavi dithuimwagasi'nana! ⁹Sarimire kayaa'nanyanna sarimi simunya' taanga maa'divi' kale yihyadeihi kinna kwalaalya dizila! Sarimi jika givanigasaihi sarimire jika gyavwi maroyimaa'napiji kinna dizila! Sarimi a'mwe dahaa' yilaaya yivanigasaihi yilaaya ya sabwi maroyimaa'nya kyapiji kale naange' yihyana! ¹⁰Nabaai Naangere tinnyari sarimi saihi kwaakewi dimarulawakinyila! Nabaai sara yipija' Naangei sariminyi munyaba yihimakiladelyi.

¹¹Nya'mweihhi, sarimi sirya'mweraavi yagaala kayaa'nanya mudipinera! A'mwei gya'mwe pwari yagaala kayaa'nanya, yaasiwakyagaala widazai gannya gya'mweri jidavajai sai kiwinya dinikevina yagaala kayaa'nanya widozi Kiwinya' jidavadelyi. Nabaai kiwinya dinike' jida'na yija' yi gimi Kiwinya dinike' nayaa mididinyaigi mi'. Aawa. Yawibwa'dinyaigi wijida'dinyaiginyi. ¹²Gotiyai yune gave pwainanyai kiwinya dinika daza wakadengi. Sai sara yada yawibwarya'nei mwaaidelyi. Sai yune gave sahwai a'mweraavi yiniga wi'na padaihasamaarannei, a'mweraavi kayaaka yigalakannei mwaali'. Sarevidaa'nyi a'mwe pwari wijidaya'neigi aai gimwaaiahakaigina!

Nemi pihadika myaannebwinesi.

¹³Dara didivisaihi nayaa dinyu'nyila! “Dahaa' pigaa', mwanayaga' kigaa' anga naanga piba wawaaji kwarama pirivi yiniga wi'nanne!

mubya'neina wawinya yaadeinera. Sarevi nabaai nemi nigwia kwalaalya naanga maraadeinera.” Yi sariminyi dara yihithima! ¹⁴ Sarimi myawirivaniga! Yirita mwanayaga! beni yima'nade dingaka? Sarimire gaala mwaalyabwi gatha'darebulaka! Sare! darevinyi. Sarimi jita yide sa'bisaihilyi. Jisa! yidehaa! kibawa maali'na wa'da yarai yimaanyina yadevaabita sarimire gaala mwaalyabulyi. ¹⁵ Pigaa'na sara dahilakya'na madipinera! Aawa. Dara dipijaihilyi “Naangei gannya simunyaburi sara yawiraja! nemi gaala kuna mwalawaaji wawinya piri' wawinya kiri' yaadeine.” ¹⁶ Sare kiri' sarimire wawinya'na yaasiwa' yagaala naanga damaryadivi' sariminne yaya munyaba makinadivisaihilyi. Sasare yuya pihadika yuya sa, kayaa'nanyangi. ¹⁷ Sarevidaa'nyi a'mwe nawi'nya ya sabwina Gotiyai wibwaridaakwojiyabwina yawi'dei, sasare sabwi mi yajai pibwi yajai yi a'mwe dazai wana kayaa'nanyabwi yadelyi.

A'mwe gilyivikiravinakeraavina dinikebwinesi.

5 ¹ A'mwe gilyivikiravinakeihi, dahaa' nayaa dinyu'nyila! Sariminyina “Taanginya yuya yima'nima!” dada yihivanika sanna sarimi simunya nayaa jawirila! Sarevi sarimi kinna dadivi' jakinna dithanganyila! ² Sarimire yuya gilyivikirayaji yiwaala yuyaji mena bwia bu'nikengira. Nabaai yuya sarimire kwaabihannya yuya sa maa'nyaannyara mena dabu'divisangi. ³ Sarimire goliyaji silivaayaji mena napolika yinikengi. Napolika daza sarimire kayaa'na yadivisabwi sarimire nigwia nayaa mamaremwaalyadivisabwi ku'maayaba marima'naabathengi. Sara yoji napolika sa' sarimire kilaakeji' dike'bi' nadeziki. Sarimi gilyivisaji nigwiaji kwalaalya yi'bwarakipija' kiri' yirika aaya'negaa' yarai yima'nadehaaki. Gotiyai a'mweraavi maryawibwaradehaaki. ⁴ Kadika nayaa du'nyila! Wawinya yadivisara sarimire wawinyangi tika wapaaya yabwaryadivita sare'na sarimi sahwarraavi kwaasi widadivi' kumire nigwia pini kaanya tihiremwaaidivisaihilyi. Nigwia sarimi kaanya tihiremwaaidivita daza jaka naanga dangamanikengi. Nabaai Sigunyaviya Kwalaalyaraavire Naangei jaka sa kadika mena wi'nivanikengi. ⁵ Yuya sagaa' sarimi Kwaaka davaki mwaaidivi' gilyivita yuya nawi'nyanna nawi'nyanna maa'divisa'na wabahilaaka naanga maa'divi' yilaaya yadivi' mwaaidivisaihilyi. Sarimi bulimakaawoyara tika kwalaalya nadivi' sigunnakera yima'nadivisarabisaihi yima'niwaasaihilyi. Yi Gotiyare Yirika sari' sariminyi tamakya ya'negaa' mena yima'nivani! ⁶ Darevinyi. Sarimi a'mwe yida'maraanga kwari kotiya mena maryeva jidaveva mena tamakiwaasaihilyi. Sare sa'na nabaai sariminyi wanganakina yihyada mala sa'na tivikita mihivani!. Sasareihi gilyivikiravinakeihi Gotiyai taanginya yihizaavade'na kinna dadivi' jakinna dithanganyila!

Taanginyagaa' kwaamu'nanyavi mwalaade'nesi.

⁷ Nya'mweihi, sarevidaa'nyi sarimire simunyaburi nayaa diraginya yivaimwadivi' yuya taanginya sangi dimaredaayila! Sara yapiji Naangei

ayina bathegaa'na jemwaalyila! Yithaanyi, wawinyavi gyakwalaanga kwai tika munne tewaanya kima'nojina dada yemwaaidevaabisaihilyi. Wawinyaviya sai gamire simunyaburi diraginya yivaimwada burikevinaji nyilyavinaji burika diviyavinaji yemwaaidelyi. Burika sawaai wawinya' yunebanna mena kyakilyi, sagaa' tika munne yabwaryadelyi. ⁸Nabaai sarimi kwaihilyi simunyabwi diraginya yivaimwadiwi' taanginya yuyangi dimaredaayila! Naangere ayina bathehaa' ayahiba menanyira. Sare'na sarimire simunya' diraginna nayaa warana! ⁹Nya'mweihi, sarimi sirya'mwe pwaraavina mayagaala madipinera! Bulayagaala madipinera! “Sare sa'na Yawibwasai kayaa'nanya nanyirivikiradika!” dapi myipina! Yithaanyi! Yawibwata sai kaadihisavi mwasilaa daavikei yemwaaimani'. ¹⁰Nya'mweihi, yikamaangera a'mwe pwaraavi kayaa'na wigaidaapi kiri' sahwara kumire simunya' diraginya yivaimwadiwi' taanginya daza maredaaveta ke'ba'nanyaraavina nayaa jawirila! Yi sahwara Gotiyari wi'neva pwaraavi wijiwaakesara Naangerine yayavina widesare. Sarimi sasare sabwi maarapiji nabaai sahirivi mididivi' jamarideihilyi. ¹¹Yithaanyi! Nemi dara dadaanyaine. A'mwera kumire simunyangi diraginya yivaimwannadiwi' taanginya maa'divisara yilaaya yadivi' tewaanaanga yinikere. Sarimi Ne Jopi kigaakuna mwalyaakerina yagaikiwinya dinike kadika mena wi'nadivisaihilyi. Sai gamire simunyaridiraginya yivaimwada gaminyi taanginya yuya sa wima'nakelyi. Nabaai dividaa'nyi aayagaa' Naangei sahwari tewaanyabwina wiakelyi. Sara yawirangamaniga'. Sahwari sara wiake'na nemi dara yawi'manigo. Naangei neminyina kale naanga wiada nabaai yuyagaa' kale'na gaimwanga neyadelyi.

¹²Kiri' nimore nya'mweihi, aaya mudi'nanya sarimi jide darengi. Sarimi Sigunyavine yayasi Kwaakevakine yayasi piningine yayaji dadivi' nebwina yagaala diraginya' yima'nya'ne' madipinera! Yi sarimi dina “Yayo,” nabaai “Yayo daaza sa' wi'nanyi.” Yi sarimi dina “Aawa,” nabaai “Aawana daaza sa' wi'nanyi.” Sarimi “Nebwina yagaala diraginya' yima'nya'ne' yaasiwa'na mudiwina! Gotiyai nanyijidavadika!” dapi sara madipina!

Gotiyari limwaga'daa sahwari widadaanya'nesi.

¹³Sariminyidaa'nyi sirya'mwe pwai kwai taanginya' kininnakei dahamwaalika? Sai Gotiyari nayaa widana! Sirya'mwe pwai kware simunya' yilaaya dahayivanika? Sare'na sai Gotiyari yiledaasa' dana! ¹⁴Nabaai sariminyidaa'nyi sirya'mwe pwai nabalinakei dahamwaalika? Sare sai Naangere kusilaanyaviyaraavire naangeraavi jaka widathelyi. Naangerine yayavi gamire kilaakejiki welivananya' purapiji gaminyaba sahwari tewaanya yavada'galade'na Gotiyari widipika! ¹⁵Nabaai sahwarina Gotiyari diraginna limwadiwi' yidaangabiza!

Naangei nalaavinakeri tewaanna wiada ayina yidikaavadelyi. Nabaai sai kayaa'nanya pini yajanna Naangei kayaa'nanya yuya daza duimwagasi'nadelyi. ¹⁶Sarevidaa'nyi sarimi sirya'mweraavi sarinnya kayaa'nanyanna dizalikorakyila! Sara yadivi' sarimi sirya'mweraavi nayaa yavada'galade'na Gotiyari nayaa jithaanganyila! A'mwe yida'maraangeraavire Naangeri yidaanganyabwi sa' diraginya yima'naabathesi. Yi sa' a'mweri yiniga wi'na gaimwagathesi. ¹⁷Yilaajai Gotiyare wi'nawijiwaakakei sai a'mwe nemibi' avainanyalyi. Sai Gotiyari diraginna kidaangana' "Burike' nalaabathika!" daka sagaa' Kwaakevaki kwarama dawaai da' yaka lawe ata puridaa'nyi pu'na burike' mwalaabyakesi. ¹⁸Nabaai sai ayina kidaangana' sagaa' sigunya' burikevi maryasaabina kya' yithaanyi, sagaa' Kwaakevaki tika munne ayina warina.

¹⁹Ninnya nya'mweihi, sariminyidaa'nyi a'mwe pwai kwai Gotiyare yagaala nebulya' yagalya'mavoji gya'mwei pwai kwai widozi ayina makabozu ²⁰nabaai neya'mwe dazai dara yawiradelyi. A'mwe pwai a'mwe kayaa'nanyabwi yaderi gaimwagozi sarevi a'mwe kayaa'nanya yadei tuta kayaa'nanya' yagalya'mavoji Gotiyaryawinna ayina kabozu sarevi a'mwe dazai gannya kuryai ayina maaradelyi. Gamire kuryai kayaaka yuyagaa'na yinadei mi'. Sasare dazaburi Gotiyai kayaa'nanya kwalaalya marasi'nadelyi.

Jemizai